



27.10.2021

UKA2021/35

**Innarluutilinnik sullissisut atorfillit ilinniagaqarnissaat, ilinniaqqittarnissaat pikkorissartarnissaallu pillugu nuna tamakkerlugu periusissiorinissamut iliuusissatullu pilersaarusionermik Naalakkersuisut suliaqaqqullugit Inatsisartut aalajangiiffigisassaattut siunnersuut. Periusissiaq iliuusissatullu pilersaarut kingusinnerpaamik UKA2022 saqqummiunneqassaaq, iliuuserisassatullu siunniunneqartut qanoq nalilersorneqartarnissaat pillugu pilersaarummik amma imaqassalluni.**

(Inatsisartunut Ilaasortaq Sofia Geisler, Inuit Ataqatigiit)

Inatsisartunut ilaasortap Sofie Geislerip siunnersuutaannut Siumumiit imaattumik oqaaseqassaagut.

Siumumiit isumaqarpugut ullumikkut ilisimasat pigisavut naammattut, taamaammallu kissaatigaarput Inuit Innarluutillit tapersorsorneqarnissaannut inatsit 2019-mi maani inersuarmi partiinit tamanit tunuliaqutserneqarluni naammassineqartoq malillugu Naalakkersuisut sulissasut.

Inuit Innarluutillit tapersorsorneqarnissaannut inatsit ersareqqissaartumik oqariartorpoq Naalagaaffiit peqatigiit inuit innarluutillit pisinnaatitaaffii pillugit isumaqatigiissut naapertorlugu sulineq ingerlanneqassasoq.

Periusissiorinissaq immini ajunngilaq – Kisianni ima paasineqassanngilaq periusissiap suliarineqarnerani sulineq unittoortinneqassasoq, ullumikkut pisariaqartitsineq qanoq ittuusoq ilisimavarput aamma kukkunerugunanngilaq oqassagaanni inunnut Innarluuteqartunut qanigisaasut tassaammata pisariaqartitat suunerinik ilisimasaqarnerpaajusut. Taamaammat kissaatigaarput aningaasat periusissiornermut atorineqartussat angajoqqaat qanigisaasullu naapisinneqarnerinut atorineqassasut. Nammineq Innarluuteqartumut qatanngutaagama nalunngilluinnarpara qanigisaasunut naapeqatigiinnerit ingerlanneqartarsimasut qanoq ikorfartuutaatigisartut, qanigisaasut pisariaqartitaat tassaapput allanik immisulli inissisimasunik naapeqateqarneq avitseqateqarnerlu. Siumumiit kissaatiginerujussuarput allaffissornikkut periusissiaq ingerlanneqarnissaaninngaanniit inuit pineqartut naapeqatigiisinneqarnerinut periusissiorinissamullu ilusilersueqataanissaannut atorineqassasut.

Siunnersuutigineqartut sulineq ingerlanneqassappat periusissiaq iliuusissatullu pilersaarut siusinnerpaamik aappaagu ukiakkut ataatsimiinnermi saqqummiunneqassaaq, tamatuma malitsigisaanik aalajangiiffigisassatut siunnersuusiorsinnaaneq takorloorneqarsinnaavoq – taamaaliornerlu siusinnerpaamik upernaakkut ataatsimiinnermi 2023-imi piumaassalluni, saqqummiunneqartoq sunaassagaluarnersoq isumaqatigiiffiuguni siusinnerpaamik 2024-imi aningaasanut inatsimmut ilanngunneqarumaarpoq – taamaattoqassappat. Taamaammat



Siumuminngaanniit periusissiap suliarineqarneranik utoqqatsissuteqarluni sulineq kinguarsarneqassanngitsoq kissaatigaarput, inatsit ullumikkut malitarpur ersareqqissaartumik piumasaqarpoq tassalu Inuit Innarluutillit pitsaasumik ineriartorfiusumillu inuuneqarnissaannut inuiaqatigiinni aporfissat piarneqassasut.

Inunnik immikkut isumassorneqartariaqartunik sullissisut kissaatigaat Namminersorlutik oqartussat iluanni Kommunellu iluanni sulisut assigiimmik oqaatsinillu paaseqatigiiffiusunik tunngaveqartumik oqaloqatigiinnerit ingerlanneqassasut.

2017-imi Innarluutillit illersuisuat Tilioq pilersinneqarpoq, Siumumiit kissaatigaarput aningaasanut inatsisissami Tilioq annertunerusumik aningaasaliiffiqineqassasoq, taamaaliornikkut pisortat inatsisit atuuttut iluanni eqqortumik inunnt pineqartunut sullissinerat nakkutiginneqataaffiqineqassammat. Tamatta kissaatigaarput inuiaqatigiinni sanngiinnerusortavut allatuulli ataqqinassusilimmik inuiaqatigiinni inooqataassasut, isumaqanngilagulli periusissiornikkut tamanna qularnaarneqassasoq, ilisimasat naammattut pigaagut tamakkuli pitsaasunik timitalersorneqarnissaminnut piareersimasut isumaqarluta. Taamak oqaaseqarluta kissaatigaarput aningaasat allaffissornermut atornerqaratik inunnt pineqartunut tigussaenerusumik tutsinneqartalissasut kissaatigaarput.

Vivian Motzfeldt, Siumut